

共同經課 - 1 使徒行傳二章十四 a 節，三十六節～四十一節

總是彼得 kap 十一個使徒 khiā-the，36 Án-ni 以色列全家 tiòh 確實知，chit-ê 耶穌，上帝已經設立伊做主，做基督，就是 lín 所釘 tī 十字架ê。37 眾人聽了，心內刺鑿，對彼得 kap 其餘ê使徒講，兄弟 ah，阮 tiòh 怎樣做？38 彼得 kā in 講，Lín tiòh 反悔，tāk 人 tī 耶穌基督ê名受洗禮，到 hō lín ê 罪赦免；koh beh 受聖神 ê 賞賜。39 因為所應允ê歸 tī lín，kap lín ê kia<sup>n</sup> 孫，以及 lóng 總遠遠ê人，就是見若主，咱ê上帝，所 beh 召 ê。40 Koh 另外用 choē-choē 話干證，來苦勸 in，講，Lín tiòh 救家已脫離 chit-ê 邪ê世代。41 Tùi án-ni，接納 in ê話ê人 lóng 受洗禮；hit 日約略加添三千人。

共同經課 - 2 詩篇一百一十六篇一節～四節，十二節～十九節

1 我疼耶和華，因為伊聽我 ê 聲，我 ê 懇求。2 伊已經 a<sup>n</sup> 耳孔聽我；所以我一世人 beh 求叫伊。3 死無 ê 索纏 tiòh 我，陰間 ê 痛苦擒 tiòh 我；我 tú-tiòh 患難憂苦。4 我就求叫耶和華 ê 名，講，耶和華 ah，ta<sup>n</sup> 求你救我 ê 性命。12 耶和華賞賜我一切 ê 大恩，我 beh 用甚麼報答伊？13 我 beh 捧起救恩 ê 杯，求叫耶和華 ê 名。14 我 beh tī 伊眾百姓 ê 面前，對耶和華謝我 ê 願。15 耶和華看伊聖 ê 百姓 ê 死，做真寶貝。16 耶和華 ah，我實在是你是你 ê 奴僕；我是你 ê 奴僕，是你奴婢 ê kia<sup>n</sup>；你已經 tháu 開網縛我 ê 索。17 我 beh 用感謝 ê 祭獻 hō 你；Koh beh 求叫耶和華 ê 名。18 我 beh tī 伊眾百姓 ê 面前，對耶和華謝我 ê 願。19 Tī 耶和華厝 ê 院內，Tī 你耶路撒冷 ê 中間；Lín tiòh o-ló 耶和華。

共同經課 - 3 彼得前書一章十七節～二十三節

17 無用外貌取人，是照 tāk 人 ê 行做來審判 ê，lín 若求叫伊做父，就 tiòh 存驚畏，來經過 lín 寄腳 tī 世間 ê 時 chūn；18 因為知 lín 受贖脫出 tùi 祖公所流傳空空 ê 行做，m̄ 是用會敗壞 ê 物，或是銀，á 是金；19 是用寶血，親像無瑕疵，無污穢 ê 羊 á ê，就是基督 ê 血；20 伊 tī 未創造世間 ê 時是所事先知 ê，就 tī chiah-ê 時 ê 路尾為 tiòh lín 著現 ê；21 lín tùi 伊來信上帝，就是 hō 伊 tùi 死人中 koh 活 ê，也 hō 伊榮光，致到 lín ê 信 kap òng 望 òng tī 上帝。22 Lín tùi 順 thàn 真理已經清氣 lín ê 神魂，致到疼兄弟無假，就 tiòh tùi 心切切相疼；23 lín 已經重頭生，m̄ 是 tùi 會敗壞 ê 種，是 tùi boē 敗壞 ê 種，tùi 上帝 ê 道理，是活，是久長 tī-teh ê。

共同經課 - 4 路加福音二十四章十三節～三十五節

13 Siāng hit 日，學生中有兩人去一個鄉社，名 Í-má-ngó，離耶路撒冷二十五里。14 In sa<sup>n</sup>-kap 談論所經過 lóng 總 ê 事。15 In teh 談論相問 ê 時，耶穌本身近 oá，kap in sa<sup>n</sup>-kap 行。16 In 兩人迷目，致到 boē 認得伊。17 伊對 in 講，Lín 行 ê 時，sa<sup>n</sup>-kap 辯論 ê 是甚麼話？In 就 khiā-teh，面帶憂容。18 其中一個，名 Kek-liū-pa，應伊講，你 kiám 單身出外 tī 耶路撒冷，也 m̄ 知近日 tī hia 所經過 ê 事 mah？19 伊 kā in 講，甚麼事 ah？Inka7 伊講，就是拿撒勒人耶穌 ê 事；伊是先知人，tī 上帝 kap 眾百姓 ê 面前所講所行有權能；20 也 hiah-ê 祭司頭 kap 咱 ê 序大解送伊去定死罪，釘伊 tī 十字架。21 但是阮平素 teh òng 望伊就是 hit-ê beh 贖回以色列 ê。M̄-nā án-ni，koh chiah-ê 事成已經三日 lah。22 Koh 阮中間幾 nā ê 婦人人 hō 阮真 gông-ngiáh；因為 inphah-phú 光到墓裡；23 無看見伊 ê 身屍，就來講，in 有看見天使出現，講伊 koh 活 lah。24 阮中間幾 nā 人到墓裡，果然看見照婦人人所講 ê；總是無看見伊 25 耶穌對 in 講，無知 ê 人 ah，先知所講一切 ê 話，lín ê 心怎樣 hiah oh 信 ah！26 基督受 chiah-ê 艱苦，來入伊 ê 榮光，Kiám m̄ 應該 mah？27 就 tùi 摩西 kap 眾先知起，見若聖經中所指伊 ê，lóng kā in 解明。28 將近所去 ê 鄉社，耶穌親像 beh 行 khah 遠。29 兩人強留伊講，請 kap 阮 toà；時已經 oà<sup>n</sup>，日 beh 落 lah。伊就入去，beh kap in toà。30 Sa<sup>n</sup>-kap 坐桌 ê 時，耶穌 thèh 餅祝謝，peh 來 hō in。31 In ê 目睭開，就認得伊；liám-pi<sup>n</sup> 無 koh 看見。32 In 就 sa<sup>n</sup>-kap 講，路裡伊 kap 咱講話，開拆聖經 ê 時，咱 ê 心 kiám 無熱 mah？33 就即時起身，tò 去耶路撒冷，tú-tiòh 十一個學生，kap 同 tī-teh ê 人聚集 teh 講，34 主果然 koh 活，也出現 hō 西門看見。35 In 兩人也講起 tī 路裡所 tú-tiòh ê 事，kap tī beh 餅 ê 時 in 怎樣認得伊